



SPRACHWELTEN

I n'è betg simpel

En ina tscherta vegliadetgna entschaid'ins a ponderar. «Vi jau ina giada uffants u betg? Na dattan uffants betg dapli problems ch'insatge auter?» Questa dumonda è in pau provocanta e dira, però sincera e giustifigada.

Ina scena sin la piazza da giugar: insaquantas mammas discurran da lur problems cun ils uffants. In mat è egocentric, l'auter è scuidus, in'autra matta elegia sezza sia vestgadira, malgrà ch'ella n'ha betg anc in gust per la moda ed in'autra matta sa scogna nonstop cun ils camarats ed uschia vinavant. N'èn quai betg problems? Bun, las chaussas positivas vegnan menziunadas a l'ur. «In rir d'in uffant è uschè bel. Sa fultschar la dumengia cun il mat u la matta en letg dat uschè blera forza. Ed a

la fin finala pens jau era a la nova generaziun cun mes gens – e natiralmain era quels dal partenari. Tgi tgira nus sch'i fa da basegn? En ina tscherta vegliadetgna daventa era quai in tema. En general fan ins memia blers pensaments. Ina persuna m'ha ditg ina giada: «l'instinct da mamma arriva tuttenina ed alura sas che ti es pronta per ina da las pli impurtantas incumbensas en tia vita.» Probablmain ha ella raschun. Tenor quest motto spetgan numerusas dunnas sin quest di magic. La quota da naschientschas sa sminuescha. Cun gronda probabilitad spetgan da memia... Inqual giada èsi simplamain meglier da ristgar e betg tadlar sin tschels. Uffants èn en mes eglis il pli grond regal en la vita, era sch'i n'è betg adina uschè simpel. Pertge betg vesair il positiv e s'allegrar dals nunemblidaivels muments cun ils uffants? Gust da moda vi e nà, jau pens al surrir da l'uffant.

Sibylle Pfiffner